

1640

28. Jan. an 12.

RELATION

1630

VERITABLE

DE CE QUI S'EST FAIT
ET PASSE' ENTRE LES AR-
mees de l'Empereur & celle du Roy
de Suede en la presente annee 1630.

Selon les Memoires enuoyez
d'Allemagne.

*Ensemble l'Estat de l'Armee du Roy de
Suede, le nombre de la Cavallerie &
Infanterie, avec le nom des Chefs.*



A P A R I S,

Chez JEAN MARTIN, sur le Pont-Saint-
Michel à l'Ancre Double.

M. DC. XXX.

AVEC PERMISSION.

17. May 21. 1832

RELATION

CASE

F
39

OF THE

163022

163022

163022

163022

163022

163022

163022

163022

163022

163022

163022

163022

163022

163022

163022

163022

163022

163022

163022


163022

163022

163022

163022

163022



RELATION

VERITABLE DE CE

QVI S'EST FAIT ET PASSE
entre les Armées de l'Empereur
& celle du Roy de Suede, en la
presente annee 1630.

*Selon les Memoires enuoyez
d'Allemagne.*



'E S T chose assez cogneuë d'un
chacun, qui a tant soit peu d'ex-
perience des affaires presentes
de l'Allemagne, que dès l'an
1628. le tres-auguste Roy de Suede Gousta-
ue Adolphe, à present regnant, a par le
moyen d'un bon secours arraché des pat-
tes du General Valstein, la ville Anseati-
que de Stralsond, assise sur la mer Baltique
au Duché de Pomeranie, de laquelle sa
Majesté ayant accepté la protection & de-

fence, à la tres-grande instance & priere du Magistrat & habitans d'icelle, y auoit mis vne forte garnison, apres que les gens du Roy de Dannemarc (selon l'accord fait entre luy & ledit Roy de Suede) en furent sortis.

Aussi est il notoire, que ledit Valstein fut contraint de leuer honteusement le siege de ladite ville, apres y auoir perdu plus de vingt mille hommes des siens, par le rapport mesmes de ses propres Colonels & Officiers. Laquelle il ne laissa pourant de tenir bloquee, & par toutes sortes d'hostilité incessamment trauallee, iusques au mois de Mars de ceste presente annee, & tant que ceux de la ville furent cōtraints de penser à quelque expedient pour s'ou-
 uir vn passage à leur liberté, & trou-
 uans celuy de mer le plus commode & ne-
 cessaire, ils se resolurent de l'effectuer, &
 d'attaquer l'Isle de Rughen situee vis à vis
 de leur ville, & occupee par leurs ennemis,
 qui de leurs deux forts, s'entreflanquants
 de l'Isle, & de terre ferme, endommageoient
 continuellement tous les nauires & autres
 vaisseaux qui passoient,

Pour l'execution dequoy, le Cheualier

5

Lesse, qui pour lors commandoit à la ville, enuoya le 30. dudit mois six cens hommes dans l'Isle de Hiddensee, lesquels forcerent la garnison du fort du vieil passage, à traiter de sa reddition: ce qui se fit heureusement à mesme iour.

Du depuis le Colonel Imperial Goëts ne pouuant venir à bout d'un traité de paix, ou de neutralité, dont il auoit fait faire ouuerture par les Estats du Duché de Pomeranie à la ville de Stralsond pour l'amuser, se presenta le 26. Avril avec trois mil hommes de pied & six Cornettes de Cavalerie deuant le fort: Mais se voyant salüé d'une infinité de canonades, il se retira & alla descharger sa colere sur le plat pays.

En suite de ce mauuais succez, il reuient aux mesmes traittez, par le moyē desquels on auoit tasché de les tromper autresfois: Mais pouuans bien iuger de l'intention de leurs ennemis, par les iniustes surprises des passages de Garts & Griffenhaghen, qui furent faites en mesmes temps contre la foy donnée, ils se trouuerent obligez de se pouruoir par des moyens plus asseurez.

Le 7. Iuin après que les portes de la ville de Stralsond eurent demeuré fermées

quelques iours durant , le susdit Com-
mandeur avec les Colonels Hall &
Crichbaum , & seize cens hommes de
pied & trois cens cheuaux sortirent , &
estant renforcez de quatre cens hommes
du Fort pris le 30. Mars , marcherent con-
tre le grand Fort du nouveau passage, situé
contre vn autre qui est en terre ferme, ap-
pellé le Fort Brandeshaguen. Ils firent in-
continent trauailler aux fortifications par
trois cens payfans qu'ils auoient amassez,
& pourueurēt si bien à leur retranchement
que le lendemain l'ennemy ne les pouuoit
plus endommager ny de l'vn ny de l'autre
fort.

Sur le soir du mesme iour ceux du fort
de Brandeshaguen enuoyerent vn bateau
pour secourir ceux du fort de l'Isle : Mais
les batteries Suedoises , & les Chaloupes
logees là aupres, le firent promptement re-
tourner avec perte.

Le 9. du mesme mois les Suedois auan-
cerent tellement leur trauail , qu'on pou-
uoit ietter vne pierre dans'celuy de l'enne-
my , qui ne laissoit de tirer incessamment,
combien qu'avec peu de fruit.

Ceux de terre ferme enuoyerent enco-

res vn batteau , lequel s'approchant de l'Isle, trente mousquetaires furent commandez de se loger au dessus du fort, & d'empescher le batteau, ce qu'ils firent, nonobstant les empeschemens de ceux du fort, lesquels ayans laissé vne porte fort estroite ouuerte pour leur sortie, & se voulans retirer par icelle, partie de ces trente mousquetaires entrèrent pêle melle à la faueur d'un broüillar qui se leua tres espois en plein midy. Les Suedois demeurez au trauail, se voyãs fauorisez de ce broüillar & d'un vent impetueux, qui poussant toute la fumee contre le fort, l'assaillirent en mesme temps, passerent les fossez à la nage, arracherent toutes les pallissades, grimperent aux ramparts, & plusieurs entrèrent par les embrasures, arracherent les massues des mains des assiegez, & en tuerent vne cinquantaine. En fin par vn cry horrible de vie sauue, ils la donnerent à 250. hommes avec vn Capitaine & Enseigne qu'ils menerent tous prisonniers à Stralsfond.

Mais ce que chacun admire dauantage, sont les progresz des garnisons Suedoises en la facile reddition du grand fort & pas-

sage d'Eiland, dans l'Isle & Principauté de Ruguen, qui s'est faite ainsi qu'il s'ensuit.

Ceux de Stralsond estans sortis en plein midy le 17. Iuin, & passé dans ledit pays de Rughen iusques au nombre de trois mille hommes de pied, & quatre compagnies de Cauallerie, se mirent en bataille deuant le fort d'Eiland, & en mesme temps y arriuerent deux Catauelles, & vtize Chaloupes pleines de soldats, à fin de les assieger aussi par eau. Ceux du fort voyant l'approche par mer & par terre tirent incessamment leur canon pour les repousser : mais nonobstant ceste grande resistance on planta huit pieces de canon que les Suedois auoient amenez à Stralsond avec lesquelles ils endommagerent le canon dudit fort : mais ne peurent faire breche au rampart qui estoit trop espoix. Le 18. le Colonel Suedois surnommé le Cheualier Leslé somma ce fort : mais il receut pour response qu'ils estoient resolu de se deffendre iusques à l'extremité de leur vie. Le 19. sortit auant midy vne Chaloupe du fort de Brandeshaguen, qui est vis à vis du fort Eiland dās la Rugue pour le rafraischir d'eau douce, sur laquelle chaloupe ceux de Stralsond

sond tirerent quantité de coups de canon,
 comme aussi firent ceux de ces deux forts
 pour sauuer leur chaloupe qui leur ve-
 noit, & à force de tirer de part & d'autre,
 se fit vne si grande fumee qu'à la faueur
 d'icelle les Suedois de Stralsond se resolu-
 rent, quoy que sans commandement ny
 ordre d'attaquer ledit fort de viue force, ce
 qu'ils firent si bien & heureusement, qu'ils
 furent plüstost dedans que la garnison ne
 s'en apperceut, tuant tous ceux qui s'op-
 posoient à eux, & donnerent la vie à deux
 cens soldats qui se rendirent. Ainsi ce fort
 de Brädeshaguen fut pris le 20. Iuin à neuf
 heures du matin, auquel on trouua six ca-
 nons de Bronze, soixante tonneaux de
 biscuits, force moutons, oyes, poulles, &
 quelques tonneaux de pouldre. Les Bour-
 geois de Stralsond en faueur de cette vi-
 ctoire donnerent cent tonneaux de biere
 aux soldats, & apres en auoir rendu graces
 à Dieu, il firent tirer tous leurs canons en
 signe de ioye. Les soldats Suedois durant
 tout le siege ne perdirent que trente des
 leur. Voila les progrez que firent ceux de
 Stralsond sur les Imperiaux, pendant que
 le Roy de Suede de son costé poursuiuoit

aussi ses exploits.

Le 21. Iuin, les ennemis voyans ne pou-
 uoir plus tenir le fort de la terre ferme, &
 ayans à chaque moment aduis des apro-
 ches du Roy de Suede, ils y mirent le feu,
 & se sauuerent à Gripfvvald, laissant par ce
 moyen le passage ouuert, lequel iusques à
 lors estoit fermé aux grands vaisseaux vers
 Stralsfond.

Le mesme iour quelques Colonels Im-
 periaux venans à Stetin y demanderent
 quartier pour trois Compagnies de Caua-
 lerie seulement, à ce qu'ils disoient: Mais
 le Duc de Pomeranie leur remonstrant
 qu'il ne vouloit ruyner ceste ville qui luy
 restoit seule les refusa, & se resolut avec le
 Magistrat d'icelle de faire renforcer la gar-
 nison de mil hommes.

Deux iours auparauant le Commissaire
 Suedois y auoit enuoyé vn homme, pour
 remonstrer au Duc que le Roy de Suede
 ayant compassion de l'estat miserable de
 la Pomeranie, s'en approchoit pour le re-
 mettre avec la liberté de la Mer Baltique,
 & du reste des oppressez, & qu'il prioit le
 Duc de n'accorder aux Imperiaux aucun
 quartier en la ville de Stetin, s'il ne vouloit

rendre ceste place le siege de la guerre.

Le 29. Iuin, stile vieil, ou le 9. Iuillet stil nouveau, le Roy de Suede estant party de Suede & forty du Port Elsnabben avec plus de deux cens Nauires, arriua prez Vvolgast, suiuy d'autres d'heure à autre, & desbarquerent le soir du mesme lieu en diuers endroiçts, & ne fut son passage sans souffrir de grandes incommoditez à cause des vents & tempestes qui auoient separé ses Nauires: Ioint à cela que la biere & le pain commençoit à manquer en quelques vnes.

Les Imperiaux aduertis de la descente du Roy de Suede fortifierent le Chasteau de Vvolgast & assemblerent leurs troupes à Gripfvvalde pour y faire vn camp, avec intention de faire teste à l'Armee de Suede.

Le 10. de Iuillet ledit Roy de Suede print port en la ville de Stralsfond avec bonne partie de son armee qui estoit de trois flottes, l'vne de treize Nauires, l'autre de quatre-vingts, & la troisieme de septante, & de plusieurs autres qui sui-uoient, en resiouyssance dequoy fut chantée le *Te Deum Laudamus*, & fit passer son

Armee près d'icelle par la riuere de Peine au nombre de quinze mil hommes, auxquels se ioignit aussi tost la garnison Suedoise, faisant en tout vingt mil hommes: & alors on n'ouyt en Mer & au Havre que bruits de canonades, mousquetades, de Tambours & Trompettes, ce qui donna tellement l'espouuante aux Imperiaux logez en diuers lieux, qu'ils se retirerent à Gartz & Griffenhaghen, lesquels ils pillerent, où aussi tost que lesdites garnisons furent sorties celles de Suede y entrerent; de là ledit Roy s'aduançant s'en alla droit vers Anclam.

Outre ceste Armee cy-dessus, arriuerent encores audit pays quinze autre mil hommes, sans ce qu'on attendoit encore d'ailleurs. De sorte que ces contrees là semblent estre inondees de fortes & puissantes Armees qui s'entresuiuent. Et mande on de Suede qu'outre ces forces ledit Roy faisoit aussi embarquer en Prusse 18. mil hommes, en Stokcolme autre 18. mil hommes, neuf mil hommes en Finland, & deux mil de Riga, outre ceux qui estoient prests en plusieurs autres havres pour les joindre.

Le Duc de Pomeranie ſçachant l'arriuee du Roy de Suede luy enuoya des Deputez le prier de ne paſſer outre, & de ne luy cauſer de l'incommodité; Le Røy leur declara qu'il n'eſtoit pas venu à cét effect: Mais pluſtoſt avec intention de deliurer luy & les autres oppreſſez de celle qu'ils ſouffroyent depuis ſi long temps, les mettre en leur eſtat & liberté, & de pouruoir à la ſeureté de ſon propre Duché; Que ſ'il plaſoit au Duc d'aggreer ſes offres, il eſtoit preſt de le faire Duc de Pomeranie, ce qu'il n'eſtoit pas alors, & de luy rendre comme au vray Seigneur tout ce qu'il prendroit par l'eſpee, deſirant enfin que le Duc luy aſſignaſt temps & lieu où il pourroit conſérer avec luy.

Le 20. Iuillet le Roy de Suede ne ſe voyant aſſeuré du coſté de Stetin, trouua eſtre neceſſaire de ſ'y acheminer avec cinquante voiles, & deſembarqua aupres du Chasteau d'Oderburg, mettant ſes gens en bataille, qui conſiſtoient en quatre vieux Regimens de pied deſcendus à terre. Ledit Roy y eſtoit en perſonne habillé d'un habit gris en ſoldat, le colet chamarré de galons d'or, ſans plumache ny eſcharpe.

Le Duc de Pomeranie luy enuoya le Prince de Curland avec quelques vns du Magistrat de la ville pour reïterer ses protestations, que le Roy de Suede ne passast outre, & cependant fit mettre en armes toute la garnison & Bourgeoisie de Stetin, de laquelle estans sortis aucuns par curiosité pour voir les gens nouuellement arriuez, le Roy les voyant il leur parla de la façon, comme il s'ensuit :

Mes chers amis de la ville de Stetin, i'ay telle confiance & esperance en vous, que vous vous estes resiouys en vos cœurs de mon arriuee, bien que ne l'osiez encores declarer : Je vous prie donc pour l'amour de vous, & de vostre prosperité & salut, si vous l'aymez, permettez moy que ie me pourmene avec ce peu de gens sur ces remparts, vous n'en ferez aucunement incommoder, & encores moins endommager, ie ne vous demande moy mesme quartier outre vos murailles; ce que ie vous dis aussi veritablement que ie suis nay Roy de Suede.

Et ayant sceu qu'il y auoit vn Consul ou Bourgmaistre de la ville avec eux, le fit venir deuant luy, luy bailla la main, se tint descouuert aussi long temps que le Bourgmaistre, le supplia & força quasi

de se couvrir ; Ausquels le Roy parla ainsi :

Messieurs & bops amis , ie vien à vous comme vn amy enuoyé de Dieu pour vous sauuer avec vostre bon Prince , des tyrans & voleurs ; le ne viens pas icy comme vn grand Potentat à qui vous deuiez rendre grand honneur : mais comme vn simple soldat pour vous deffendre. C'est pourquoy ie vous prie derechef de ne me faire arrester plus long temps icy. Car vous ne pouuez obtenir la neutralité que vous demandez.

Et comme ils s'en voulurent excuser, & voyant ledit Roy que le delay des habitans estoit tres-grand & hors de saison, il fit instance que le Duc luy vint parler, & l'ayant attendu iusques à vne heure apres Midy, enuoya vn Comte Palatin son allié en la ville, qui apres vne longue deliberation fit venir le Duc enuiron sur les trois heures.

En mesme temps le Roy de Suede se faschant de la longue attente, marcha en bataille iusques au blanchissoir de la ville vis à vis du Chasteau du Duc, & le Gouverneur luy ayant enuoyé dire par vn tambour qu'il tireroit sur luy, il fut respondu par ledit Roy qu'il attendroit les trois pre-

miers coups, apres lesquels il seroit audit
Gouuerneur d'aduiser à ce qu'il auroit à
faire.

Le Duc de Pomeranie estant descendu
de son carrosse, marcha vers le Roy,
qui s'aduança vers luy, & le caressa en
s'excusant de ce qu'il le venoit voir de la
façon : mais que c'estoit en bon amy, &
pour le venger tant seulement de ses enne-
mis qui l'auoient si miserablement ruiné &
s'estoient pris à luy en Prusse sans aucune
raison l'annee passée, que son intention
n'estoit pas de surprendre quelque chose
sur l'Empire, ny de charger le pays : mais
plustost de le soulager, priant qu'on eust
cette confiance en luy, sans laquelle il ad-
uiferoit tousiours aux moyens de bien gar-
der ce qu'il auroit prins sur lesdits enne-
mis, & luy parla encore en ces termes :

*J'ay sauué & deffendu heureusement la ville
de Stralsond, par la grace de Dieu, avec vne grande
deffence : l'ay gaigné avec l'espee la Principauté de
Rugben & d'Vsedom, dont ie ne vous demande
rien, & n'ay desir de retenir ces pays icy; ains m'of-
fre de vous affranchir le reste de vostre Estat des
voleurs & brigands, & en peu de temps moyen-
nant la grace de Dieu, & quand cela sera fait, ie*

vous

*vous rendray vostre pays pour le garder & conser-
uer vous mesme.*

Surquoy le Duc de Pomeranie luy de-
manda s'il scauoit bien les forces que son
ennemy auoit; & s'il estoit bastant de luy
faire teste; le Roy respondit qu'ouy, &
qu'avec l'ayde de Dieu il esperoit le battre
avec ses forces: Qu'il auoit amené avec
luy dans ceste flotte trente mille hommes,
& qu'il en auoit payé autres vingt mille
qui le suiuroient bien tost; outre lesquels il
auoit deux armées volantes dans Prusse, à
Rughen; Vsedom, & autres lieux qu'il ne
vouloit point nommer. Le Duc loua son
dessein & le remercia.

Après cela le Roy print incontinent
congé de luy, disant: *Mon Cousin soyez en repos
& ne vous donnez point de peine, j'espere que Dieu
m'assistera, & benira mon dessein, seulement ie vous
prie de faire mieux dans vostre mariage, autrement
ie vous supplieray de m'adopter pour vostre fils &
heritier: ce qu'il luy dit en riant & de bon-
ne grace: car ledit Duc n'a point d'en-
fants.*

Après cela le Duc de Pomeranie s'estant
abouché avec les siens à part, & les delibo-

rations de la ville de Stetin tirans de longue, le Roy les pria qu'on depeschast : ce qui fit résoudre la ville à laisser le tout à la discretion du Duc, qui desiroit que le Roy se retirast dans le iardin le plus proche, où il fist coucher par escrit quelque forme de capitulation : Mais ledit Roy dit, que tout cela n'estoit que perte de temps, & qu'estant dans la ville, il accorderoit toutes les demandes du Duc, lequel il ne presseroit point de faire chose qui fust contraire au serment qu'il auoit presté à l'Empire & à l'Empereur.

En fin estant sollicité d'entrer en la ville sans gens de guerre, respondit, qu'en vne ville qu'il scauoit estre remplie de traistres & estrangers, il ny pourroit entrer sans garnison ; à quoy la ville acquiesça, & l'entree luy en fut permise : Mais le Roy n'ayant faict au soir que donner ordre aux remparts, coucha hors la ville à Oderburg qu'il fit retrancher iusques à icelle ville, dans laquelle apres tout cela le Roy monta luy mesme au fossé imparfaict, & mena gaillardement ses quatre vieux Regimens sur le rempart par vn pont de bois estroit, en

bon ordre, & mesmement comme s'il eust eu l'ennemy à dos, mist ses gens en bataille & faisant retirer les gardes bourgeoises, il mit en leur lieu les siens avec le canon. Par apres il pourueut aux gardes des portes & des ponts, & fit sortir de la ville quelques soldats & viuandiers de l'Empereur, & ainsi se rendit maistre de la ville de Stetin.

Le Dimanche suiuant il vaqua au seruice diuin, & fit prescher aux soldats sur les rempars. Le lendemain il sortit de la ville sur les huit heures, accompagné de plusieurs seigneurs, & s'en alla à quatre lieues de Stetin sur vne montagne, où il fit dresser le plan d'un grand fort.

Ledit Roy a avec luy de braues & courageux Capitaines & soldats, & fort experimentez à la guerre, & luy mesme veut neantmoins estre par tout. Il ne decouure son intention à personne, & faict charier forces pièces de canon pour le camp. Ses principaux Officiers & soldats couchent dans des tentes, dessus les remparts, & en la campagne : car il dit qu'il n'est loisible au soldat de coucher dans vne chambre. Aussi luy mesme va coucher la nuit dans

son Nauire; Il ne iure point, & si ses soldats iurent, il leur fait enchaîsner les mains & les fait leuer en haut vers le Ciel comme pour prier Dieu durant quelques heures.

En suite de ce que dessus, le 21. Iuillet la ville de Stargard, avec son chasteau, fut prise, & vne grande partie de la garnison tuee, on y a trouué douze mille tonneaux de farine.

Et le 26. dudit mois, le Maistre de Camp de l'armee nommé le sieur Goustaue Horn arriua de Liuonie avec ses troupes, & se joignit à celles du Roy dans l'Isle d'Vse-dom, & pres de Vvolgast, dont le Chasteau commençoit desia à capituler. La garnison de Valstein en voulut sortir avec meschos allumees des deux bouts, leurs armes, le canon, & les drapeaux desployez, ce qui leur fut refusé, tant à cause de la mine qui deuoit iouër, que pour les insolences qu'ils auoient faites.

Les Imperiaux ont quitte quasi tout le derriere de la Pomeranie, horsmis la ville & havre de Colberg, & prennent leur chemin dans la Marche de Brandebourg. Ils

ont dressé leur Camp pres le passage & ville de Garts.

Ledit Chasteau & Citadelle de Vvolgast ne s'estant voulu rendre sous des conditions raisonnables, le Roy a fait iouer la mine le du mois de qui a fait sauter en l'air bon nombre des assiegez, & le reste a esté tué par les assiegeans. Apres ce bon succez le Roy est allé incontinent vers la ville de Gripsvaldt, qui est maintenant bloquée & assiegee par mer & par terre.

L'Administrateur de Halle a surpris Magdebourg & la ville de Halle, dont la garnison s'est retiree au Chasteau de Moritzbourg (où l'on croit qu'elle ne s'y pourra pas deffendre long temps apres la prise de la ville.) On a mis quantité de viures & bon nombre de bestial dans Magdebourg, qui est auituaillé pour long temps. On a emmené dans ladite ville plusieurs prisonniers des gens de l'Empereur, & entre autres deux Colonels Croattes, avec la femme d'un autre Colonel, lesquels emmenoient quant & eux un grand butin qu'ils auoient fait sur les pauvres habitans

du pays.

Lesdits Suedois se sont rendus maistres de la Mer de Pomeranie, par la prise qu'ils ont faite de l'Isle d'Vsedom par cōpositiō, & en sont sortis 15. compagnies de l'Empereur, chacune de trois cens hommes, & ainsi le Roy de Suede traueille à s'emparer de toutes les autres places maritimes de ceste Mer, ce qui est cause que les Imperiaux commencent à s'assembler en corps d'armee comme il a esté dit cy-dessus, n'ayant fait iusques icy que sonner la retraite & abandonner les petites villes & bourgs qu'ils occupoient apres les auoir pillées. Les Suedois s'estans emparez à leur barbe des places & Isles de Vvollin, Vvarder, Cammin, & presque de tout ce qui leur restoit és costez de la Mer Pomeranique.

Le Comte Torquato General des trou-pes laissées audit pays par Valsstein, a empesché tant qu'il a peu que le Roy de Suede ne s'approchast pour assieger Anclam, qu'il a neantmoins prise depuis, ainsi qu'il en faisoit courir le bruit, & forma vne Armee pour deffendre ceste place, & vne au-

tre pour conseruer Garts & s'opposer aux desseins des Suedois.

Par lettres de Pomeranie du vingt-cinquesime Iuillet on mande que le Roy de Suede a pris au mesme pays la bonne ville de Goluar, & mis garnison dedans, que plusieurs s'estonnent de ce que le General de l'Empereur a enleué toute la Cauallerie de la Pomeranie Vltérieure; d'autant que si le Roy de Suede fait faire vn Fort derriere Stetin, comme on n'en doubte point, alors Gripenhaghén seroit tout à fait bloqué. Et si on luy donne cognoissance du Pont de Garts, il faudra necessairement que toutes les forces de l'Empereur qui sont dans la Pomeranie Vltérieure, se rendent, estans surchargez & tyrannisez par des contributions excessiues qui les fait souhaitter vn changement nouueau.

Au mois d'Aoust le Roy de Suede faillit d'estre tué par vne ambuscade qui luy estoit dressée, ainsi qu'il se verra par la teneur de cette lettre escrite d'Hambourg le quinziésime du mesme mois.

IE ne doubte point que ne sçachiez ce qui a peñ-
 sè arriuer au Roy de Suede : mais peut estre que
 n'auetz peu entendre les particularitez, ledit Roy
 allant recognoistre vn passage, luy vingt-troisiesme.
 Vn Lieutenant Colonel en qui il se fioit fort le-
 menoit, lequel en mesme temps auoit aduerty
 l'ennemy, du lieu où le Roy deuoit passer, & qu'il
 y dressa vne ambuscade. Ledit Roy passe sans au-
 cune deffence, visite le passage auquel il se void
 comme surpris : Car voulant repasser il luy fut im-
 possible. Vn Colonel Liunois auquel il auoit com-
 mandé d'attendre son ordre à quelque demie lieue
 de là, voyant que ledit Roy tarδοit tant à repasser,
 enuoye quelques Caualliers pour sçauoir de ses nou-
 uelles, lesquels apres auoir marché vn peu loin,
 ouyrent le bruit de force mousquetaires, surquoy
 ils rebrousserent chemin & vont aduertir ledit
 Colonel, qui part aussi tost avec les gens qu'il
 auoit, & court à toute bride vers le Roy de Suede,
 passe sur le ventre à tout ce qui se vouloit opposer à
 son passage, & sauue le Roy fort exposé au peril
 de sa personne, son cheuul luy ayant desia esté
 tué de deux mousquetades comme ledit Colonel ar-
 riuua vers luy. On a mis prisonnier à Hambourg
 vn Capitaine de Caualerie, qui a desia confesse
 qu'il a voulu assassiner le Roy avec vn Lieutenant
 Colonel

Colonel qui s'est eschappé & sert maintenant les Imperialistes, mais que le nombre des bons seruiteurs du Roy les auoient empeschez desia auparavant, non vne fois d'en venir à l'execution, aduoiant que luy & ses complices auoient eu tres-bonne corespondance avec le Comte Torquato, qui commande en Pomeranie en l'absence du General Valslein, on attend ce qu'il confessera à la question.

Au reste, le Duc de Pomeranie ayant prins le party du Roy de Suede pour sauuer son Estat, a fait publier l'arriereban à toute la Noblesse & tiers Estat de son pays de se rendre en l'Armee dudit Roy sur peine de la vie & perte de biens.

Cela causera vn grand bien aux desseins dudit Roy, & y a apparence que par tout où il s'approchera le mesme se fera.

Les Imperiaux voyans tant de progres du Roy de Suede en prennent telle espouuante, qu'ils quittent presque toutes leurs places & se retirent. Le General Valslein ayant sceu l'arriuee dudit Roy en est demeuré tout triste, & n'y a eu moyē de l'aborder, sçachant par lettres escrites de Kistrin que des compagnies entieres de

Cauallerie se rendent audit Roy. Cependant iceluy Valstein amasse en grande diligence toutes ses forces dispersees & logees au large dans l'Empire, ausquelles il donne rendez-vous au port du Pont de Dessau.

Les nouuelles de la poste confirment aussi que le Comte de Tilly se ioin dra avec l'Armee Imperiale, pour attaquer conjointement le Roy de Suede.

Estat de l'Armee du Roy de Suede pour la Pomeranie.

CAVALLERIE.

ALLEMANDE.

LA Garde du Roy, vne compagnie.

La Garde de Monsieur le Chancelier, vne compagnie.

La Garde du Comte de la Tour, vne compagnie.

La Garde du Maistre de Camp, vne compagnie.

Le Regiment de Reingraff, douze compagnies.

Le Regiment du Colonel Streif, cinq compagnies.

Le Regiment du Colonel Baudis, douze compagnies.

Le Regiment du Colonel Ioncker, cinq compagnies.

Le Regiment du Colonel Vvangel, cinq compagnies.

Le Regiment du Colonel Jacques, cinq compagnies.

Le Regiment du Colonel Zacharias, vne compagnie.

Major Grot, a vne compagnie
de trois cens hommes.

Cauallerie Finlandoi- se & Suedoise.

Septante-sept compagnies Fin-
landoises & Suedoises, sous diuers
Comtes & Seigneurs ; ensemble
toute la Cauallerie qui est de cent
dix-sept compagnies, chacune de
cent chevaux.

Infanterie Allemande.

Le Regiment des Gardes dudit
Roy sous le Lieutenant Colo-
nel Deuffel, douze compagnies.

Le Regiment de Finrodens,

huiet compagnies.

Le Regiment de Nothen, dix
compagnies.

Le Regiment de Klitzing, huiet
compagnies.

Le Regiment de Vvoteluin,
huiet compagnies.

Le Regiment du Colonel Grot,
quatre compagnies.

Le Regiment de Tifchera, huiet
compagnies.

Le Regiment de Mitscheual,
huiet compagnies.

Le Regiment de Krigbaum,
huiet compagnies.

Le Regiment du Baron de Ze-
rotin, huiet compagnies.

Le Regiment de Ramsey, dou-
ze compagnies.

Le Regiment du Comte Spens,
huiet compagnies.

Finlandoise & Suedoise , qui est cent quatre vingt-quatre compagnies.

Toute l'Infanterie de deux cens quatre-vingts quatre compagnies, sous didiuers Comtes & Colonels, chacune cent cinquante hommes.

Outre la forte Garnison ordinaire de la ville de Stralsond , & de l'Isle de Rughen, & autres places, sans nommer les deux Armees du Camp volantes.

Il est permis à IEAN MARTIN Imprimeur & Libraire, d'Imprimer la Relation de ce qui s'est fait & passé entre les Armees de l'Empereur & celle du Roy de Suede , & deffenses à tous autres de l'imprimer.

